

Macedone, ut idem Geographus docet. Quartò *Alexandria*, quæ à Paride dicta, memoratur non à *Strabone*, sed à *Stephano*, cujus, sub nomine Strabonis, perperam sunt verba à *Patino* allata, ad vocem *Alexandria*. In margine est nomen *Stephani*, quod fortè emendatio fuit neglecta à Typothetis. Sed perperam notatur Lib. xii. *Strabonis* in eadem margine, nam Lib. xiii. agit de *Alexandria* Troade; sed de loco à Paride dicto in *Ida monte*, non *prope Idam*, nihil habet. Quintò *Strabo* *Antigoniam* ab *Alexandria* Troade minimè distinguit, ut ex ejus verbis vidimus. Sextò, *Strabo* nequaquam dicit à quo sit Colonia Romana ducta *Alexandriam*, neque memorat Augustam vocatam. Verum hæc ex nummis & tempore quo scripsit *Strabo* colligitur. Multos habet nummos *Patinus*, ubi vocatur hæc urbs, TROAS COL. AUG. Sic in paucis verbis multiplex admixta est ab erudito sanè Antiquario hallucinatio. Hoc unum maximè miror, quò in rectam viam non sit tot numismatum consideratione revocatus. Sed alius, non minùs eruditus Antiquarius, *Joannes Foi-vaillant*, quem non contendendi studio, sed obiter monendi, appello, misuit, contra Historiæ fidem, Ilium & Troadem, in *Numismatibus Aneis Impp. &c. in Coloniis, Municipiis &c.* percussis; dum Troadensibus tribuit quod de Ilienibus dictum est. Si legat vir doctissimus *Strabonis* Lib. xiii. & locum præsertim à nobis allatum, videbit Ilium non fuisse eandem urbem, ac *Alexandriam* Troadem, neque hæc nomina umquam cum Ilio mixta à Veteribus. Hæc scripseram, cum animadverti virum doctissimum, ad numismata à Troadensibus in honorem *Alexandri Severi* cusa, ex *Polybio* animadvertisse duas esse urbes Ilium & Troadem. Itaque suâ sponte ab errore in viam regresso merita laus non est deneganda; lectoresque quæ antea dixit, de duabus urbibus, quasi una fuisset, hinc ut emendent sunt monendi. Neque enim dubium est, quin *debtregay* *Qenrides* hic sint *σφάτεγαι*. Cum sic cespitarint viri tam docti, & humaniorum litterarum usque adeò periti, non mirabimur bonum *Lubinum* toto cœlo errasse: *Troas*, inquit, Aët. xvi. 8. regio *Asiæ Minoris*, olim pars *Phrygiæ*, *Ægeo mari* exposita. Ipsa est quam *Stephanus* Trojam vocat. Atqui nusquam *Stephanus* Trojam hanc urbem vocavit, sed Troadem. Pergit *Lubinus*: quæ, ut ait, prius *Idæa*, postea *Teucris*, deinde *Troja*, tandem *Troas*, exscidio urbis Trojæ notissima. *Stephanus* quidem auctor est ad vocem *Troja* dictam eam urbem *Idæam*, *Teucridem* & *Trojam*, sed non dicit Troadem vocatam; nec umquam Troas, exscidio Trojæ innotuit, sed contra, liberatione vicini Ilii, illustris facta est ut narrat *Polybius* Lib. v. sub finem. Tandem: *Eam adhuc Stephanus*, inquit *Lubinus*, infra appellat *Troias* &c. Antea sat multa de hoc loco diximus, nec quidquam addemus, nisi eos qui ejusmodi libros versare soliti non sunt, nisi ubi necesse est, ut quærant quidpiam, sæpe mirum in modum ab iis falli. Nunc ad *Samsonem* redeamus.

TUBAL. *Melius*, inquit, *Thubal*. Rectè, nam Hebraicè vocatur תובל *thoubal*, sed optimè fecisset, si cum *Bocharto* Phalegi Lib. i. c. 12. dixisset signari hac voce Tibarenorum montium incolas. Sunt enim ejus rei multa & gravia argumenta.

TYRUS. De vetere & nova Tyro multò accuratius, ex Veteribus, egit *Joannes Marshamus* ad Sæc. xi. & xviii. in Chronico Canone Ægyptiaco. Noster rem, tamquam per nubila lunam, vidit. Antiqua Tyrus erat in continente, ante Nabuchodonosorem, à quo diruta cum fuisset, nova urbs est condita in Insula opposita. Sed Alexander fretum interpositum aggere opplevit; factaque est peninsula, quæ antea insula erat. Hæc Veterum testimoniis confirmata invenies apud *Marshamum*.

V.

VALLIS ENNON. Saltem scribendum erat ENNOM, nam Hebraicè constanter scribitur הנום *hinom*. Pars fuit vallis Cedron, de qua vide *Joan. Lightfootium* in Chogr. præmissa Matthæo Cap. xxxix.

UR. Vide not. ad vocem *Chaldæa*. Sed de situ *Uræ* pluribus agentem *Bochartum* Phalegi Lib. i. c. 10. & Lib. ii. c. 6. adito. Illinc puto hausisse nostrum quidquid habet hic boni.

HAEC notanda habebamus ad *Samsonem*, at non ut justo Commentario eum illustraremus, quod numquam in animo fuit; si enim plenius hac de re scribere vellemus, mallems novum ædificium, quod totum nostrum esset, à fundamentis usque excitare; quam in alieno ædificio hic & illic nonnulla emendare, quibus emendatis, multa essent adhuc mutanda, ut symmetria ubique observaretur. Potissima dumtaxat *Samsonis* delicta attigimus, minoribus prætermisissis; nec ea notavimus, ut celebris Geographi existimationi quidquam detraheremus, sed ne ejus auctoritate rudiores fallerentur. Addidimus etiam passim, unde plura & meliora peti possint, in gratiam eorum, quorum hæc accuratius nosse intererit.

F I N I S.